

四庫全書

集部

欽定四庫全書

集部

道園遺稿卷三

詳校官庶吉士_臣李如筠

侍讀_臣孫球覆勘

總校官檢討_臣何思鈞

校對官編修_臣沈清藻

謄錄監生_臣范鳴謙

欽定四庫全書

道園遺稿卷三

元虞集撰

七言律詩

代祀西嶽會袁伯長王繼學馬伯庸三學士二

首

紫禁沉沉曙色低
奉祠羣使已班齊
承恩歸院迷烟樹
乘傳開關踏雪泥
蹉跎共憐駢苑馬
逶迤不若聽朝雞

山川有事寧辭遠咫尺成都是國西

棧道年年葺舊推已將平易履崔嵬經行關輔圖中見
夢戀鄉山馬上來諸葛精神明似日相如情思冷於灰
重思親舍猶南國願託江波去却回

自仁壽回成都

還鄉思速去鄉遲王事相縻敢後期里父留看題壁字
山僧打送捨田碑胡桃筇竹南方要盧橘杞杞上國知
此日君親俱在望徘徊三顧欲何之

題王庶山水

蜀人偏愛蜀江山圖畫蒼茫咫尺間駟馬橋邊車蓋合
百花灘上釣舟閒亦知杜甫貧能賦應嘆揚雄老不還
花重錦官誰得見杜鵑啼處雨斑斑

張道士蜀山圖

碧玉參天是蜀山舊曾飛度歷屨顏松風上接空歌外
蘿月長懸合景間試劍丹崖秋隼疾濯纓清澗夜龍閒
君家虛靖歸來日冉冉蓬壺為憶還

范文正公書伯夷頌二首

并序

伏承主奉范君示先世詔及文正公手書伯夷頌令集題識仰惟前賢爭光日月不敢妄有贊述輒以鄙句奉謝用表惓惓景慕之意云

慶厯元臣細字書清風直與伯夷俱路韓並識何春應秦賈爭藏實蟻汙神物護持天愛寶子孫驚喜海還珠敢以微塵讚喬岳願推餘砭及頑夫

企仰前賢歲月深阿衡事業伯夷心義田猶是當時祿
遺像能令百世欽竊頌詩書求彷彿默嗟人物轉銷沉
誰人浪漫矜家世看取天平萬石林

拜歐陽文忠公遺像

知公難遇已當年況復瀧岡十世阡金石舊藏存劫火
丹青遺廟祀鄉賢終身未必慙韓愈作者誰能繼馬遷
鳴鳳不聞驚歲晏長懷清潁一茫然

輓文文山丞相

徒把金戈挽落暉南冠無奈北風吹子房本為韓仇出
諸葛安知漢祚移雲暗鼎湖龍去遠月明華表鶴歸遲
何須一作人更上新亭望大不如前灑淚時

從兄德觀父與集同出榮州府君宋亡隱居不
仕而歿集來吳門省墓從外親臨叩韓氏得
兄遺蹟有云我因國破家何在君為唇亡齒
亦寒不知為誰作也撫誦不覺流涕因足成
一章併發其幽潛之意云

我因國破家何在君為唇亡齒亦寒南渡豈殊唐社稷
中原不改漢衣冠溫溫雨氣吞殘壁泯泯江潮擊壞欄
萬里不歸天浩蕩滄波隨意把漁竿

興聖宮朝退次韵袁伯長見貽是日上加尊號
禮成告謝集即東出奉祠齋宮

翠蓋重重寶扇斜從官穿柳散慈鴉過宮路遠紆天步
上壽杯深閣雨花玉貫兩虹通象錦衣成五綵練雲霞
奉祠東出蓬萊道春水鳬鷺踏漢槎

朝廻和周南翁待制韵

三十六竿吹鳳皇九重春色絢天光卿雲微動旌旗煖
湛露初稀草木香貝葉神師東度嶺金輿馴象北浮洋
小臣職在歌功德拜手陳詩對日長

挽歌辭

中天太白貫晴虹頃刻龍飛返上宮萬國共賔賜谷日
羣臣忍把鼎湖弓潛蕃回首金山遠顧命傷心玉几空
聖主已頒哀痛詔蒼生有淚灑西風

和李秋谷平章小車詩

雪晴官草隱晴沙相國朝天試帝車
班馬晝移溫室樹鳴鸞晨度掖垣花
褰帷每命賢俱載趣駕頻煩使至家
此日龍門誰執御擁紅正履侍金華

送朱伴讀南歸仁卿

喜子南歸盱水上經過為我問臨川
幾家橘柚霜垂屋何處蒹葭月滿船
應有交遊憐遠道試從父老說豐年
寒機早晚成春服一一平安報日邊

送李通甫赴湖廣行省都事

黃鶴樓前江水春，江花飛接渡江人。
日長青瑣文書簡，雨過滄洲杜若新。
應共庾公揮扇坐，每尋崔顥賦詩頻。
三公舊掾多為相，行見迴車載繡茵。

畲周伯輝

翔鳳

百酌宮壺醉曉霞，望中鴻鵠盡天涯。
故園賓客千金賦，飛燕尋常百姓家。
上國春深花滿眼，河陽市上果盈車。
古來鐘鼎多憂思，待得人間兩鬢華。

伯輝北山堂

北山有萊中作堂樂只君子不可忘
紫氣常占少微下
壽星今在長沙傍
佳哉競秀五男子
少者遠客諸侯王
執筆題詩嗟未敢
杜陵之祠烟樹荒

東鄧善之

山雨不來喧靜夜
江雲猶為護晴朝
一羣青雀墻花老
幾個黃鸝苑樹遙
何有深心期管樂
獨無高步接松喬
未能徑去成飄忽
且可相從慰寂寥

用退朝韻奉懷伯長試院久別

藝閣羣策手封斜徧閱縱橫墨濕鴉拜賜頻酣千日酒
思歸寧惜少年花此時吟詠齋官曙同是瞻承絳闕霞
想有小團分學士好將新水試浮槎

送高尚志下第歸江西

清霜木葉水多灣知有荆人抱璞還龍擁湖波迎月下
豹乘雲氣候林間殺青汗簡三冬足生白虛齋一日閒
會望斗牛尋寶劍春朝佩入紫薇班

題李道復所作艾全真乃父墓銘

道人何處京城中擬託斯文壽乃翁萬里烟塵惟兩履
一時製作見羣公江湖所過蛟龍識金石他年物怪通
我憶廬陵多舊事瀧岡阡樹足秋風

次韵二首

春去園林百草生千源流漲到池清心期自與浮雲遠
鬢髮新如積雪明白苧寬裁無束帶黃冠小製不垂纓
故人相見那相憶但聽橫空鶴數聲

丹閣岩堯地最親頻年染翰侍嚴宸九疑鳳去荒烟外
三月鵲啼野水濱日落賈生將去宅江迎庾信獨歸人
五湖不遠閑身在扶杖風前詠暮春

今代廣文真畫師蘓州把筆更題詩白雲遠海意蕭散
明月滿樓光陸離積妄已空前日夢清狂那憶少年時
老夫獨感深相慰盛德加餐報祝規

眉菴自賦二首

新春名字合更新偶託眉菴作主人本不求妍何用妬

從來無悶豈須顰
曉對遠山烟冉冉
晚臨流水照粼粼
成都畫手應無數
憑仗他年寫得真

憶自當年學畫眉
畫成何意望人知
鑒觀水影真無愧
接對天光豈有私
獻笑豈隨桃灼灼
效顰應許柳絲絲
菴中妙用何聞見
未及東風賦紫芝

次韻寄謝魏雄卿錄事表兄

短棹移家竹樹東
曉鬟擁翠夜鐙紅
誰為重客投卽令
徒有高堂舍蓋公
白雪上鬚無藥染
絳霞盈頰已樽空

憑君莫笑黃花冷自有清吟與客同

和僕世南除西臺御史

鳳池共愛十年身一榜今為七爭臣
識字觸邪誰與敵讀書知律自能神
關中多少遭逢甚輦下同年聚散頻
萬里玉門歸控制向來投筆亦儒巾

游岡子原呈王學士

岡子原頭春色濃小車晨出看東風
雨餘林潤人鳥好日煖沙平我馬同
西引峰巒來座上東瞻樓閣

一作起觀

天中詠歸莫作匆匆晚儻解相逢擊壤翁

次韻寄元復初二首

木落天清悲素秋故人何處海東頭
尊前夜月仍留戶天際浮雲重倚樓
影靜梧桐餘倦鳥眼明洲渚自輕鷗
人生會合真堪惜長憶春風從兩騶

黃梁夢覺人千里白壁歸來月一缸
尊酒幾時忘北海束書無路到東牕
卧龍宛宛水生壑飛鶴翩翩雪灑江
無限心期總寥落秋風烟樹引歸幢

次韻馬可山人見招二首

天意茫茫故可知無端感慨又先之百年開濟輸前輩
萬里登臨在此時袖手看雲歸去晚舉頭見日坐來遲
忽聞八月靈槎到欲及西風理釣絲

愛此高槐十畝陰偶來相對理瑤琴江湖有夢扁舟遠
風雨無人陋巷深濁酒竟成終日醉花枝聊學少年簪
若為後死乘雲去爛漫銷除感物心

次仲章韻二首

日射飛塵下界昏遙瞻積翠是君門鳳鸞天上今何夕
雞犬雲中第幾村瑤草無人能遠寄玉天有道可長存
晴虹東去連滄海儻遇安期與試論

深屋古仙雙碧眸淵淵玉色象春浮上方烟霧日千變
清畫風雲時一游傾耳松濤惟立鶴迴頭塵海不藏鷗
飛飛幾欲吹笙去千歲歸來恐更愁

無塵道人

雲霧為衣月作裳天壇獨自禮虛皇龍收古劍沉秋水

鶴識神丹起夜光，金井有聲惟墜露。
玉堦無色乍凝霜，無端下界松風動。
又欲飄然上鳳皇。

和上都華嚴長老見寄二首

講帷秩秩退晨朝，咫尺東方寶月遙。
湛露甫承天子賜，慈雲還赴梵王招。
毗耶一日香薰普，瀛海羣公意氣飄。
白髮故人非玉局，敢將詩句畱參寥。

上帝曾承絳闕朝，屬車日向寶城遙。
生公屢講中邊味，宋玉空吟大小招。
梵網千重隨鏡現，天香八月向風飄。

手開樓閣能來往常候晨雞碧海寨

和斷江恩上人綠松見貽之句

誰將古色伴幽悰百尺長松對一翁子落雨餘棋局在
影搖雲際水瓶空倚藤老大何惆悵覆地陰涼待鬱葱
挽著萬牛須晚歲手開樓閣五雲東

題了堂悟上人溪聲閣

磨衲歸來閣倚坡池開半月引泉過蒼龍入鉢斂風雨
白象捲湖吹浪波宴坐不眠花寂寂飛行無跡竹娑娑

廣長舌相何時了未覺游人一偈多

賦松濤齋

曾游海上聽松風積雪千峰水接空細若鳳削雙娟娟
雄於鼉鼓萬蓼蓼玉堂夜直蟾光裏銀漢秋橫劍氣中
欲截斷槎乘浩蕩兩樵相對此時同

賦雪洲

江上經年積雪多長洲化作玉坡陀舊時射虎迷蹲石
薄暮歸魚認擁簑河伯作宮龍獻璧湘靈遺珮鳳停梭

鳬鷺容與江花發更待春來生水波

送茅秀才歸茅山

茅君兄弟茅山裏幾代曾孫骨尚清傳得元經還自讀
餌將蒼朮不須耕鶴隨雲氣來金闕鳳合風聲度玉笙
為問仙郎老仙伯書來應許學長生

送韓伯高浙西僉憲

五月樓船過大江海風吹雨灑船窓雲銷虹蜺橫山閣
潮落黿鼉避石砮闕下諫書誰第一濟南名士舊無雙

湖陰暑退多魚鳥應勝愁吟對怒瀧

寄馬叔惠福建僉憲

荔子枝頭火齊紅高堂紈扇坐薰風
湘筠簟冷魚波合海栢梁深燕雨通
絡緯豈知秋袂薄處庠長憶晚餐同
禁城來看花如錦誰道清霜解惱公

題故太子少傅翰林承旨李野齋幽居圖

車蓋歸來托遠林魯山嵩萃魯原深
漁樵相識頻分席賓客時過共賜金
百歲儀刑猶近古五朝文物至於今

披圖想見登臨地松滿徂徠起夕陰

奉元王氏孝義詩

陰陰榆柳蔭常村中有烏頭孝義門耕織事均家益贍
絲麻親盡義彌敦蜜蜂日暖開窓戶慈竹春深長子孫
先世此邦嘗賜履為歌遺俗却銷魂

賦張志甫八十

身閱昇平近百齡顏如玉雪鬢如星
遠移湘竹堪扶老舊種蒼松已茯苓
頻見大官躬致饋蚤令掌故口傳經

古來名士多肥遯徧與題詩歷下亭

送道士危亦樂歸臨川

并序

予寓居臨川三十年而隨牒京師之日過半
愛其山水之明秀而未盡游也喜其風俗之
馴雅而未盡觀也樂其人物之修整而未盡
交也然視臨川則為故鄉矣以其視之也切
故其懷之也深故見其人則喜遺其人則若
失亦人之情也況為賢者乎驪塘危氏臨川

之望族文學雅正之士世世而有之故予所
謂不得盡交者也亦樂危氏之俊彥也學道
上清山中以翹楚見稱信乎名家子孫非常
人所可及往年亦樂之從父曰虛室君與予
最相善虛室歸江南予嘗送之曰落花如海
思歸夜剪燭裁詩又送君觀乎此其風致盖
可想見于是十五年矣則亦樂之行予獨能
無言以叙其懷歸之意乎予且歸休將從子

於江湖之上周覽山川而歌詠其風俗以託諸其人焉尚未晚也叙而繫之詩曰

上清仙子臨川客暫入金門即賦歸夜月微聞雙玉珮
香塵不染五銖衣從游元圃暄風暢坐讀黃庭墜露稀
華蓋風前如覓我應看白鶴向西飛

送張用鼎還鄉

張郎兄弟人皆說二陸才華未足多騏驎西風開道路
芙蓉初日照江波周官雅頌賓興禮漢代偏崇茂異科

為語州人胡處士清時何故覓漁簑

題大都香山寺圖

香山蒼翠帝城西古寺高飛北斗齊
繞屋清泉龍穩卧對簷老樹鳳長棲
曾陪退相尋山徑亦共幽人躡石梯
忽見畫圖驚十載春雲秋雨不勝題

為馬竹所照磨題香山圖

古寺深沉壓巨鼇畫圖重見記曾遨
曉城官闕烟花合夜壑風濤樹木高
雨靜卧波雙劍影天清歸路一鴻毛

東都九老名猶在瀟灑誰同白紵袍

端午節飲客與趙伯高

龍沙冰井夏初融
簪筆長隨避暑宮
蠟燭烟輕留賈誼
銅盤露冷賜揚雄
南村久病思求艾
北客多情問轉蓬
忽聽滿船歌白紵
翻疑昔夢倚春鴻

用蕭性淵詩一句足成一章送常伯昂

華蓋芙蓉入座清
清雷踈雨過虛庭
永言自媿難傳世
急就成章易滿屏
好客無情憐白髮
幽人相顧說丹經

簞瓢便了餘生事空枉輕車到野坳

題時錄判齊山吟卷

濟南名士古來多此地登臨孰有過山影蘸湖春雨樹
泉流滿郡晚風荷客生江國猶思憶人念鄉關想詠歌
千古齊山青未了李邕杜甫奈愁何

王真人眉叟在京上都賜酒唱和

真人燕處自高堂遠賜宮壺出上方給傳許乘飛廐馬
侑樽仍有大官羊一天雨露涼如洗四座賓朋喜欲狂

起賦新詩誇得意西風傳送及

闕

送張伯雨入茅山二首

獨棹扁舟入白蘋
隱居舊宅去棲真
囊懸肘後惟丹訣
書到人間稱道民
未覺白雲留住晚
也應蒼木寄來頻
手栽松上孤飛鶴
知是華陽第幾人

隱居聞道無人蹟
麋鹿來依積雪深
每占雲氣得芝朮
莫怪丹光穿樹林
茅君自騎一虎下
木客或與羣猿吟
知爾此時最相憶
遲予飛屨度千岑

次韻熊太古題金石編

上林昔見衆芳來，春雨湛涵詠有萊。
何處北山留客住，未聞東閣爲君開。
畫須具眼方留迹，琴有知音不用媒。
多學少成多老我，每看精義欲成灰。

次韻錢翼之寫大學衍義局中詩卷

貝葉西傳淨業塵，泥金萬軸等長身。
清閒邃殿仍稽古，寂寞遺書亦發春。
承詔外庭須老手，揮毫仙館屬才人。
重觀舊事思天上，白水揚雄野水濱。

題王本齋歷官紀年畫像

歷官貴與年俱進
列畫衣冠若弟兄
出節遺風仍鎮海
生祠嘉樹各專城
丹心不改兼終始
白髮微添更老成
清夢幾時求傳說
平時早合識真卿

謝僧以長送銅龜水滴

贈我銅龜盛硯水
想君久已伴題詩
斑斕隱約知千歲
繅藉丁寧愧妙詞
豈有文章須潤色
况能經濟屬論思
祇應六月俱忘息
灌沐清泉自奉持

題靜壽道人自誌後

對雪鼓琴張道士八十二歲顏如春世外異書聊過目
人間樂事自終身如如常住誰為死擾擾相仍故是塵
知爾既忘欣戚意安排何用賦詩頻

挽危公遠道士

剪燭裁詩憶送君落花如海政續紛幾迴分別未為老
一日音容杳不聞珠樹露寒蟬委蛇玉樓風急鶴離羣
自吟新句成奇識只許人間禮白雲

與筆生

聖明天子御奎章翰墨昭回日月光畫殿風微雙鳳翥
春池波暖六龍驤侍臣近榻誇先得內史開函喜自將
借問紫毫誰所製發揮神化未渠央

白雲閒上人以橘一枝見贈予作詩以謝

洞庭嘉實龍興種百顆同枝重壓簷折遺忽疑千樹盡
分嘗猶足十人兼貢餘沾賜今難得霜後題詩尚可添
只欠吳姬團錦幄霏香嘆霧玉纖纖

答舒真人送牡丹二首

真人棋罷小徘徊手剪窓前紫綺來
天女不嫌雲霧薄洛神親擁髻鬟堆
已令老鶴婆娑舞更注清泉潄灑盃
莫遣巢翁知盛事詩筒日日片雲催

曉來睡重不聞鐘仍嘆看花似霧中
貪賞金盤承密露不知玉樹倚春風
戰酣淮水碁應勝雪擁藍關句更雄
欲畫新圖宜正午須憑狸目驗芳藂

送胡古愚

仙館醉餘千石酒上林吟遍百花風拾遺徒步頭成白
供奉歸來錦更紅晚下紫薇憐病鶴春風綠水送冥鴻
故人江上如相見為借扁舟候禿翁

游小姑及彭浪廟承學士命以示畢推官因次
韻二首

天作孤岑自幾時高危並見古人詩身當委注下無底
影絕旁緣終不移波浪秋隨天漢淨風雲未盡海門馳
釣竿拂樹思長往應有沙鷗已得知

迴舟却往彭浪石還藉枯筇得自持外險內安闕者樂
東流西狀渡來知追隨過客應無事迎享神君遂有詩
消得清秋好風日經邱尋壑昔為誰

送柳唐佐懷孟總管

滿縣花開二月初郡人日望柳侯車醉翁白髮詩情在
好客清言吏事餘河水煮魚頻入饌柿林收葉徧留書
欲從太守借盤谷手自搯茅結隱廬

題李息齋竹二首

丈翁寫竹鬢成絲不作菱蘆與柳枝
日色分明見真本
天公端的是吾師動搖如有禽相語
偃蹇惟餘石不移
靄靄春雲好才思千姿萬態總相宜

已學夷齊願息陰如何逐日轉蕭森
發揮自出形容表
摹寫誰知造化心持贈不堪憐苦節
卷懷無迹愧幽尋
更看月夜風塵定着意沉沉落墨深

題先天觀

畫來新構先天觀便欲工吟勝畫師
山挾風聲雷起陸

水涵天影日當池長生有道行行到生處無爲了知
不是三年不題句卷中爲有范樽時

次韻雲章丈欲訪德機學士故以末句相屬冀
以因行致之

風雨相求越一邦無多苗藿庶充腸東風吹雪開梅萼
南斗無河避劍光力薄薦書空汗漫情多愁髮易蒼浪
故人范叔清秋鶴誰共吟詩月滿堂

予與胥翁亞仙自劍池觀山水遇客石橋吳氏

訪自牧長老於昭福時寺新成方卜門向予
與亞仙皆以正對大羅為妙一時同遊約齋
朝輔朝佐皆吳氏之良而牧亦吳出也莫不
共贊其美因為賦詩以識之

重卓招提坐石溪開關更欲面羅池西來萬派分明意
前列諸峯蒼翠姿脩竹疎松通一徑微雲淡月立多時
千年白鶴重來晚解向兒孫話祖師

去冬過昭福留詩溪上牧所既而蒙半村先生

與國賓茂才青雲諸名勝相繼屬和盛意不
可忘也先從牧翁寄此尚須面叙區區也

隱居曾見繞清溪屋上青山屋下池老子風流宜白髮
阿戎翰墨稱雄姿每懷高閣看雲後投宿比隣聽雨時
安得青藜同照夜題詩寄惱牧牛師

贈丹士

神仙有詠煉丹砂服食三年鬚不華自有錦囊收曉露
何妨玉椀泛春霞倚松吟嘯風生袖採藥歸來月滿沙

肘後方聞多至劑青粘何日到山家

題朱澤民畫

松外浮雲過眼空前瞻無際後無終幾番白雪經行地
數尺蒼髯俯仰中健筆祇今常偃老吟詩誰似杜陵窮
悠悠無限滄洲興問取騎驢傲兀翁

題董生畫

李公昔守清江上翰墨交游有稚川每從遠海風雨至
共對小山松桂眠撥鐙何處得古法臨池忽欲無千年

嗟哉李氏孫尚幼川翁家學子能傳

羅若川畫松

暮春多雨晝冥冥羅生畫松當素屏老蛟化為劍氣黑
白鶴下啄苔痕青傳來日暮自篝火夢入幽巖尋茯苓
不遇胡僧露雙脚石函自了讀殘經

又次游仙游山詩韻

龍從山木小軒東梔子花開鼻觀通嘉節喜逢風雨外
幽懷多付笑譚中詩成彩筆從人寫醉後朱顏與衆同

却怕有人知此樂枉將山水繫愚公

董掾湖山堂

九江秀色何處好新堂正值甘棠湖春水初生蕩洲渚
晚風欲起散魚鳬自公退食對脩竹教子讀書編綠蒲
知君廉恕足陰隲行見高門紆紫朱

留上方道院

卜隱山中事已遲歸來無處着幽棲行穿深谷却車馬
借宿高齋慚黍雞茶為彌明分石鼎燈從太乙借青藜

百年身世半塵土一日林泉何足稽

寄陳湛堂法師

月宮桂子落岩阿想在林間閱貝多持足地神衣拂石
獻珠天女襪凌波香因結願留龍受水為烹茶喚虎馱
寄到竹西無孔笛吹成動地太平歌

送胡士恭

十年京國擅才華宰相頻招載後車太液蒼涼黃鵠羽
元都爛漫碧桃花三清風露仙人館萬里烟塵野老家

拂拭舊題如隔世
華星明漢望歸槎

送霜林西白長老用太白起句

峨眉山月半輪秋
我憶家鄉亦白頭
腳踏岡源流去水
身隨海岸到時舟
長空一鳥飛無迹
白雪千峯爛不收
却笑坐來銷劫石
雲興百闕若為酬

寄白雲閒上人

龍興寺裏白雲房
不到于今二十霜
橘袖向來垂屋重
松筠此日過人長
千函秘典心源淨
百歲長齋幽類香

若念尚書舊行履三生石上莫忘鄉

寄訢笑隱

垂手毗耶憶舊勞諸天幢戟擁林臯開軒坐見青松老
倚閣間看白浪高曉日上林隨步履春雲如海在揮毫
經年不得江東信獨立長春送羽毛

陳君璋新園池亭得烟雨橫塘舊扁表之本漁
塹陳氏之物我大父尚書公所書也尚書書
此時已九十年而君璋之父年且九十矣故

賦詩及之二首

烟雨橫塘識舊題
尚書遺迹久淒迷
幾回玉樹鶯聲曉
曾見雕梁燕子泥
近水樓臺隨地起
臨堦楊柳與雲齊
小車却憶堯夫老
徧洛看花信馬蹄

舊扁橫塘墨色新
百年還屬百年人
爭墩正為名隨謝
隔世何妨姓共陳
綺席聞鶯垂故舊
金盤烹鯉亦賓親
蘭亭俯仰興懷地
莫惜流觴對暮春

題蕭正肅公及尚書與楊誠齋書幅後

古木蕭森日月懸六丁猶為護遺編一門翰墨三千首
七世風流二百年秋野蒼茫麟角出春池零亂鳳毛鮮
世居鄉里如君少西望孤城憶墓田

費無隱丹室

碧雲雙引樹重重除却仙經戶牖空一徑綠陰三日雨
數聲黃鳥百花風年深不記栽桃客夜靜長留賣藥翁
幾度到來渾不語却依秋影送冥鴻

寫韻軒

翩翩仙子藥王山明月高樓遂不還天外脩眉塵鏡掩
窓中遺墨夜燈閒雲深黃竹歸無所雨暗蒼梧淚更斑
何似浮雲相遇合杳然遺跡謾人間

楊判官春雨亭

松柏園亭雨露新慈顏幽翳倍傷神三年蔬食心長慕
一勺寒泉淚滿巾孝子舊游多國士將軍遺愛在邦人
封塋近對清江曲世世能來有鳳麟

揭北海山雨亭

周遭城郭擁陂陀北海亭中逸興多木落秋風知地迫
水高春雨見帆過華簪列坐知年老翠袖深盃為客歌
說與蓬萊千仞石誰能鳴鶴倚松蘿

珉上人俯清軒

高亭直下一江清千尺絲綸寄此情秋水芙蓉華月上
春茗翡翠晚風輕坐來古硯生雲氣吟過長廊曳履聲
知有登臨無限意高山野水已相迎

楊伯恭柳隱山房

細柳誰如灞上營清江百尺坐專城陶潛雅興還堪賦
張緒華年更有情春日貫魚多鱖鯉秋風飛羽總鯢鯨
錦衣玉帶催裘馬入對長楊聽早鶯

揭北海蓬萊亭太湖石峯

海上飛來第一峯華星明月五雲中千年持載遺神物
九仞飛騰接太空不與興亡驚世換長隨山澤與時通
蒼茫獨立橫秋氣未許西山得比雄

秋屏閣

幾度秋屏真謾興，歲寒今日一凭欄。
西山廬阜連天起，彭蠡番陽學海寬。
久病豈能修客禮，舊時長感奉親歡。
老身若偕雲房宿，卧起江山正面看。

王欽道活水源堂

江上曾聞感聖衷，尋源因見出泉蒙。
風霆流動千門啟，山澤高深一氣通。
潤物已從時雨化，濟川猶歎昔人功。
野塘舊隱誰能住，一夕清涼謝太空。

題送林松礪照磨詩卷後

朱輪豪傑早知機一日冥鴻向海飛風雨交游無舊迹
江山幕府有清輝秋空淡淡蒹葭浦春晝堂堂錦繡衣
世上喬松中梁棟澗邊莫嘆故人稀

御風亭

城陰百畝轉廻塘喬木參天翠柳長飛蓋曉迎花霧氣
臨池春動墨雲香衣裳清露芙蓉淨劍佩明河水玉涼
還向人間留妙蹟蘭亭列坐詠流觴

雙檜軒詩并序

檜之為木仲尼嘗手植於魯天下後世莫不
具瞻焉學者之於聖人宜無所不學江右憲
使覃懷李公重山甫持剛方之節秉貞固之
操乃樹雙檜於家庭以自見蓋將景仰先聖
於萬一也夫木之為世用多矣大材成大器
小材成小器椅桐梓漆則琴瑟之儲焉清廟
明堂之棟梁非檜莫與也尚論聖人之所為
識其大者豈非君子之志乎乃為之賦詩曰

素王舊植魯宮牆
雙樹新陰接太行
冰雪高寒今節操
雷雲參錯古文章
河津此地營舟楫
廊廟多年待棟梁
會與羣龍近華蓋
九天朝日正蒼涼

黃仙巖

鐵色陰崖積石屯
玉顏窈窕鎮崑崙
上池降液作靈響
左角出雲承曉暎
手扶風雲穿月窟
坐當星斗直天門
昔人政有懷仙地
為挹清泉注一尊

古亭詩為張仲淵作

濟南名士古來多誰作新亭照水波百頃高荷秋興濶
一朝明月暮船過南州城上登臨賦北海尊前感慨歌
况有吹笙王子晉清風千里接鳴珂

觀畊詩為王可敏作

昔歲春畊見夢中分軺此日嘆民窮漸惟草色經行路
輟食棠陰問土風歸鴈相催知日近占魚猶願報年豐
他時緩步從青瑣寤寐難忘稼穡功

與熊天宇

去歲送花無處栽至今鄰舍借園培綠籬正要帶刺枳
並屋還須疊葉梅桑椒墻下堪食用桃李門前空綻開
故人一一可致此他年相對共銜盃

行丞相掾唐仲英事母至孝在臨川時太夫人
常藝蘭於亭中花繁茂累歲增盛異於常植
君子有以占其子孫之興也他日太夫人去
世而蘭亦悴而弗華三年而忽榮如太夫人
在時仲英感嘆如見母之存焉都人士咸以

為瑞相率為歌詞以頌太夫人之遺德而識
天錫瑞以彰仲英之孝後數年虞集在豫章
與仲英續賦一章云

唐氏慈親手種蘭三年憔悴復闌干為懷媚服慈顏喜
豈意空帷帶淚看手把栢棬春露重心知佩觿暮天寒
扶踈玉樹情何極長繞幽芳不忍看

憲府瑞栢

憲府清巖翠栢高香烟霏霧起亭臯濃熏旭日新膏沐

細引春風近羽旄
黼黻成文如錦繡
丹青生色在揮毫
德星占應賢人聚
濟濟清朝見譽髦

書蕭母傳後

并序

新喻蕭母有貞節
朝廷有魯叅政子
翬言旌表其門
莆田陳旅博士為
之傳文甚奇
子翬早學於蕭氏
陳集友也
先丞相雍公與蕭
正肅為同朝故其
家來求題云

桓桓蕭氏貞門表
猶是前朝執政家
恩詔傳言褒素履

安輿垂淚對黃華賢孫能奉高年遠薄俗寧知古道賒
魯氏交情陳氏筆臨安三感一長嗟

黃節婦詩

并序

集昔泰館閣四方孝子貞婦之事來上朝廷
者率求詩文以表章之隨事發明時義既有
所諷勸或所錄未甚備者猶推其類以著其
姓搢紳樂善成風每盈卷軸不以詞為費也
今觀雷尚書之諸孫長仁書其女弟適黃氏

貞節事皆閨門變故而始終一德非其兄不
足以知之非能文不足以發之集筆硯荒落
長仁之子以此卷相示感而賦之

貞婦初年遭百艱每將忠厚對傷殘死生家世心無愧
終始閨門義所安信有高風隨地化不營華表與時看
賢兄述德皆真實為報鄉人在史官

送阿里仁甫舟中作

送客江邊醉似泥漁村留宿已雞栖風平山影搖舟楫

雨急灘聲入鼓鼙故老別來誰尚健新詩吟罷更重題
却因農事催歸去卧看浮雲逆上溪

題高彥敬竹石

踈篁幽草澗邊生羣玉參差若弟兄更待拂雲棲紫鳳
何年臨海掣長鯨尚書蕭散今摩詰子墨淒涼舊客卿
風雨夜來家四壁龍吟微應讀書聲

南浦遐觀圖

房山避暑何王宮古木蕭森多畫風平生江海毫素裏

金匱山房
卷三
日暮鄉關魂夢中孤雲斷處更野水五絃揮罷又飛鴻
高情千仞一倚杖莫怪尚書雙眼空

古木圖

晉人筆法成中絕奇傑縱橫見米家手畫斷崖分鐵石
意求古寺帶烟霞龍髯解出空中雨鴻爪能留雪裏沙
近日尚書高彥敬高懷尤足共清華

趙伯高所藏高彥敬吳山夜景圖

吳越蒼茫咫尺間尚書能畫夜眉山塵銷海市露初下

雪積江沙潮始還座上賦詩誰絕唱夢中化鶴忽臨關
高情已逐年華去秋樹寒波共妙顏

東山圖

大傳東山杖屨行總將憂樂托高情獨攜窈窕開瑤席
雙引娉婷韻玉笙春雨松間殘爽冷秋風江上暮塵生
三分籌策煩勞甚愁悵雲霄一羽輕

百馬圖

楊柳生烟草色薰川原錦繡動成群百年海宇無征戰

一幅圖書有見聞
日夕吹笳歸別部
天寒桐乳奉將軍
當時校獵誰能賦
白髮揚雄思若雲

周昉畫

島上雲生日轉簷
海風吹雨暮寒尖
春明玉色遺薌澤
夜定珠光入鏡奩
織得鴛鴦隨綠皺
教成鸚鵡啄紅甜
試令鼓瑟應無語
目斷歸舟思未淹

天師菴壁間墨竹

憶昔卧遊脩竹地
當林日日看春生
白雲來時衆仙降

皓露如瀉松鶴鳴吹笛江深星斗動釣竿樹老浪波平
何時置我北極下獨倚高壁聽秋聲

從子旦欽賁賜金至山中次陳溪山韻

索金萬里來天上舊賜新頒捧拜餘去國棲遲慙補報
榮家歡喜度空虛孤臣清淚三生夢一寸春陰數葉書
更買青山可終隱不妨投老得安居

謝予棕雨笠

歸弄江波自濯纓白頭徒步

闕

陂晚

夏木清杜甫

關

詩更瘦遠公

關

野僧三四同來往此日先生戴笠行

題毛秀發薛元卿戴笠圖卷後

偶然戴笠過前山天賜高人一日閒薄有人情

關

無名姓在人間毛公吟罷龐眉古薛保

關

羽還

無限好懷

關

松雲千載為誰憐

止家人製衣

故人遺我布單衣寒暑相仍服不違地僻少塵擱澣易

身閒遲破補，紉稀樵漁總。識尋常好魚鳥，相忘作念非。
請看江頭木居士，雲來雲去本何依。

荒唐

齊人野語楚荒唐，野死幽囚祇謾傷。往往闕文誰復及，
悠悠沒世豈能忘。百年有道開新盛，千古遺言發耿光。
不有鳳麟同日至，誰知信順見文章。

虛齋

誰識空中有至真，一庭芳草自生春。風雲變化閑來往，

日月揮持在圭賓寶劍有神凝鑒水金丹無質現窻塵
忘言本是吾齋事莫負空同問道人

真止軒

乾坤定位易行中星拱辰居象亦同終日有言寧離此
先天無事若為工音聲倡和黃鐘始闕浮沉土釜空
世法定無相比並閑循斗柄玩東風

石巖詩為道童總管作

維石巖巖氣象超俯憐培塿獨岩堯八風不動盤坤軸

一柱高擎切斗杓江郡暮雲留遠樹湖陰積翠上春潮
便應從此為霖雨直向中天絳節朝

竹所詩為馬照磨作

蕭蕭脩竹倚闌干幕府高秋獨坐看龍化欲隨清佩響
鸞停長共碧梧寒幾年冰雪培根節一日雲霄見羽翰
聞道武公方壽愷永歌淇澳報平安

送揭子尚之京師

縣北之亭山水幽玉堂故人懷昔遊錦囊五色起雲霧

華袞一字驚林丘賢材洛下共青瑣久客襄陽成白頭
羊公沈碑聞近出文章垂世何悠悠

送李伯儀

老來多病山中住誰復能吟過客詩賈誼豈無前席夜
終軍當有棄繻時沉香亭北花圍錦太液池頭柳舞絲
初到長安還有賦東湖傳看綠漪漪

送吳志淳

古道棲遲與世違高才誰可共襟期揮毫妙得中郎法

倚席長吟老杜詩
澹澹春風湖水詠
蕭蕭夜雨竹枝詞
明年何處還能賦
驄馬金溝結柳絲

送劉仲禮遊浙

於今南斗聚文星
博士空慚老復丁
杜甫文章驚四海
中郎字畫尚羣經
才華酷似泉流峽
書法親傳劍出硎
欲看海門潮始壯
高風鳴鵠舉空青

送艾有文之靜江

桂林賓客舊多材
鼉鼓逢逢夜宴開
鄉里共推文學貴

轅門爭識故人來
幕中草檄狼烽息
座上吟詩雁字回
為問伏波天柱遠
文章何日刻蒼苔

送太原郭訢還豫章灌園精舍讀書

每思有道太原碑
復憶南州孺子祠
但得賢人千里聚
奚傷大樹一繩維
生民憔悴依高節
吾道銷沉繫遠思
誰向灌園樓隱地
下帷觀象玩微辭

送劉元補淮南漕司書吏

江南大郡多凋瘵
三月鶯花海上城
使者自持清節重

書生遠去一舟輕
圖書雲靜滄洲雁
翰墨風生碧海鯨
幕府從來賓客盛
鳴琴時自寄高情

送李仲淵雲南廉使

海上瀛洲想玉珂
繡衣今歷幾坡陀
賢人會合何其少
蓋世文章不用多
蘭楫誰迎桃葉渡
蘆聲莫奏竹枝歌
不令駟馬歸金馬
奈爾相如好賦何

送僧歸俗

孰謂儒冠多誤身
昔年聊作小乘僧
春風花影踈踈月

夜雪松濤澹澹燈巾帶便須歸賈島衣孟從此付盧能
男兒今古平生事未把丹心一寸冰

題河東李集賢倜詩後

并序

某與昭德別二十有餘年相見清江之上出
故集賢李士弘學士重游舊詩蓋李自守郡
至作詩時已二十餘年今去李公賦詩時又
幾三十年矣俯仰感嘆追和附卷末云

郡人長說使君行室有絃歌野有耕千丈沙堤春雨漲

滿舡書畫晚峯晴重來城郭誰耆舊徧刻文章自姓名
我亦從遊今白髮每懷冠佩望蓬瀛

聽劉元彈琴 并序

劉元相訪竹齋清夜為予援琴作長清飛佩
等調宛然二十餘年前聞諸四明袁公伯長
父子及巴西鄧公善之之子慶長者不勝淒
感道士張伯雨亦偏善此相別亦二十年矣
寥寥此音在天地間何可斷絕賦詩寫懷書

贈元云耳

寂寂虛堂月上遲
劉郎為我鼓冰絲
秋聲在樹誰能賦
夕露沾衣有所思
荷蕢過門良久矣
乘桴浮海欲何之
呼童明發酬佳興
三勺清泉饋石芝

陳立持所畫山水及酒饌來求詩法詩法無之
得與齋中朋友一飮之樂

拙疎生理歎衰翁
食粥何妨甌屢空
驚見殺雞供季路
喜看載酒問揚雄
畫圖乞與千山雪
詩法傳來滿袖風

令子讀書誰得似高閒甘旨不憂窮

與趙伯高論詩

莫道幽人有意吟緣情生變若推尋
竒雲映日書成字靈響盤空譜作音
春鳳雖難天廣大秋蛩唧唧雨陰沉
性情平澹隨時見禮樂何人繫古今

宿周氏東齋聞饒以和李本夜話賦此

霜月高齋會兩賢夜深情話極幽玄
退藏莫作神明化通變猶聞典禮傳
五十年華思絕學二三良友信遺編

金定四庫全書
卷三
選鋒若欲驅殘臘晴昊梅英孰與先

觀王繼學叅政贈臨川艾庸詩有感

世儒退相淮南使羨爾華裾早及門授館終年歸白粲
探囊一日試黃昏漢廷議禮諸生起魯壁藏書幾簡存
最憶龜蒙雲氣重舞雩新服試春溫

題陳維新詩卷

才子清華孰與羣古詩秋興浩如雲海中夜月珊瑚樹
江上春晴錦繡紋溧水釣魚辛少府武夷放棹杜徵君

歷觀卷裏襟期士鳴鳳朝陽與世聞

題劉伯溫行卷并序

監憲伯溫劉公出示館閣諸君子送行詩文
兩大卷其一自中臺出佐浙省時賦衆仲題
其端有以見朝廷選任之專職事之難者後
一卷則自著廷持節江右之賦也伯循跋其
左具言述作之暇道西北形勢古今之迹經
覽之壯有重會講明之約一代文物之懿備

見於斯何其盛哉其感別欣遇又知監憲公
深有得於大易智崇卑之旨庸述鄙懷敬答
盛意不勝惓惓

西極山河轍迹通載馳江海視民風帝王漸被知今遠
秦漢經營歎昔雄憂國早聞生白髮濟時誰識信丹衷
斯文一縷通微顯隨地成能造化工

題黃智仲詩卷繼熒御史黎僉事詩後

彈鋏何妨鬢漸疎侯鯖徧食武昌魚故人江海浮雲盡

歸鶴城樓落木初御史青春懷舊意郎官白首寄來書
解囊為說經行處歷歷秦川畫不如

書莊武公遺事後

莊武勲名汗簡青贊書錫爵自朝廷時傳令德連三世
家有高年過百齡曹嗣蒞官原問學封邦獻禮贊儀刑
周詢還奏澄清效袞職從容煥日星

自題為危太樸作

大地微塵海一漚取之無用棄無由日高睡覺還聞鳥

雨足歸來但牧牛冠帶衣裳明日月陶匏木石老春秋
何人寫此閒中意獨立晴空詠未休

故人

故人為別十餘春夜夢相逢面目真世外音書遺雁羽
壁間圖畫潤龍鱗可憐白髮寒仍短待得黃花晚更新
誰有高才如屈宋九歌江上樂明神

孟莊

孟莊同世不同風縱使相逢亦不同豈以高明分彼此

總於衰晚共豪雄奇才別出義黃上大業難忘舜禹功
無位無時千古逝誦言忠辯愧愚蒙

吳先生壽日

承明三召意勤渠歸老從容問燕居几杖雖塵無倦色
經綸不用有成書春深雨露多沾溉畫永風雲妙卷舒
華蓋浮邱漢儒行千年高並翠芙蓉

寄壽楊友直

恩詔來頒擁節旄壽尊酬獻畫堂高郡人傳寫登高賦

金定巳居合三
卷三
野老驚看侍宴袍
契濶舊交多
老大澄清能事屬賢勞
鳳池緩步歸猶早
鄉社耆英接譽髦

寄楊友直

山林十載便幽趣
城府連朝謝故人
前席謾言宣室事
小車且看洛陽春
舞停紈扇清樽側
醉插花枝白髮新
人為村頭農務急
不辭鈴閣渡江津

寄陳衆仲

承詔攜文入禁林
一揮四問夜堂深
五人存沒風流散

十載浮沉老病侵，曳履想迂青瑣步。
下帷傾聽白頭吟，多材政有西江客。
衣錦歸時好寄音。

寄陳溪山

坦坦幽貞夏日清，高懷千尺自秋聲。
華山雲外觀真逸，洛社春中憶舊英。
雅論圖書陳太守，靜容簪佩列諸生。
丹成有道傳中表，歲把芙蓉奉壽觥。

寄楊臨川

五月新涼似鑑湖，吏民爭候使君車。
稻田雨足臨流喜。

墨沼雲生對客書疲瘵遠人訢獨得文章列郡竟誰如
寓耕封內宜修敬老病衡茅禮節疎

寄蒙古松巖

驛舍相逢已十霜每懷高節倚雲蒼星辰劍佩趨黃道
風月圖書侍玉皇萬壑秋聲回浩蕩九霄春夢入微茫
垂絲到地苓如玉擬劖清冥頌久長

寄費無隱

清朝自寫玉宸文冠戴芙蓉着錦裙碧落開圖呈五采

素雲引練事三纁，厚真定錄，渾相識上帝臨觀。密自聞書畢，綠陰垂數畝，長疑窓戶宿春雲。

寄趙中山

清鐘曉徹轆轤乾，十載霜蟾獨自看。護法老龍恩淨梵，化人孤鶴報平安。相逢歲晚頭俱雪，想見春陽氣若蘭。欲辦芒屨求覲面，晴虛雙景共清寒。

用聶御史韻贈忻都兼寄張伯雨

尋得山泉可枕流，寒茅為舍就中洲。故人春月多新夢，

游子秋風足暮愁楊許有書留玉洞松喬無迹到瓊樓
亦知李白因貪酒頭白無緣事遠游

次韻陳溪山二首

積雪柴門晝不開行庭無迹太寥哉深根一息先天氣
平地橫陳幾劫灰潮候夜中隨月滿斗杓天際挽春來
溪翁定有扁舟興晴昊繁花問遠梅

茆簷向曉喜雲開積雪如雲安在哉春澤堅冰成解液
明窓旭日動飛灰山陰忽有移文至松下那容喝道來

小大往來原有數莫占消息向枯梅

次韻陳溪山紅梅三首

冰雪肌膚染絳雲歲寒林下對吟身
先天氣至渾如醉
初日光融轉更新
白髮無能酬造化
金丹有道駐長春
少年莫笑詩成處
傾倒相歡忘主賓

春曉紅生島嶼雲
此中儘著兩閒身
不愁花笑髮顏白
漫謗人傳句法新
曲水徘徊天上日
深杯斟酌自家春
繁英未落頻須到
翠實金盤尚及賓

雪後孤根發暖雲栽培本自一人身紫微遺意成千古
絳夢深期又一新忠厚敢忘嘉樹賦冲和思廣此枝春
若為穉子猶堪教三祝三加望大賓

來章末句有祝幼兒之意先生屢言先君手植紫
薇於堂前賦詩屬望小子時人不之許也頻仰五
十年委身田野莫稱先志集感歎成賦

次韻答楊臨川

歸興秋光晝寢高使君詩瘦怯宮袍東湖微雨生顏色

西日浮雲見羽旄
橘柚園林誰共奕
蒹葭洲渚或容舫
誰家此日樽無酒
兩鶴翩翩過九臯

舟次臨川用趙堦韻

文公經濟入精思
陸子高明自得師
投老幸依賢者國
興懷況在歲寒時
為邦孰與從先進
擇善誰將覺後知
十載郡樓遺訣語
扁舟江上感君詩

山行次韻

從來年老喜逢春
宇宙中間自在身
鬚髮還如柱下史

胸懷仍似洛中人春雷起處耕雲外曉雨晴時釣水濱
况復歸歟清晝永坐聽童子咏睢麟

次韻曹子貞

宦學三年不自歸從人飢食復寒衣蒼麟一出春秋畢
黃鶴重來城郭非靜對風雲觀變態閒吟來往玩神機
乾坤自是無今古不用窓間惜寸暉

泊舟安和阮宅次黃志高韻

十月東歸下石瀧羣公促膝共輕艘蕭雲故宅多喬木

阮籍清樽對暮江方駕肯來良馬五尺書先寄鯉魚雙
欲求深隱何山曲雪竹霜筠共一窓

舟宿湖口二首

汀沙如雪水無聲舟倚蒹葭雁不驚霜氣隔篷纔數尺
斗杓揮地已三更拋書枕畔憐兒子看劍燈前慨友生
尚有乘桴無限意催人搖櫓轉江城

長年人海混潮聲水宿荒涼却夜驚月照空巢烏繞樹
風吹短草夜知更要觀此地秋濤壯更待明年春水生

不比蜃樓多變見彩雲初日擁層城

次韻劉桂隱

懷哉歲暮扣重關置我高堂左右間
遠道無人緣已老
凡情不斷若為閒徐行歷歷皆平地
滿目青青是好山
莫怪邱園待春雨扁舟先愧逐雲還

謝廬陵兩劉君

扁舟已作渡江雲回首高年憶兩君
坐客頓知常刺史
詩人猶拜杜叅軍總看玉樹當春畫
長對青藜過夜分

他日聚星如可畫殷懃垂白更論文

山木閣一首送人之京

山木閣東初日生梅花照溪人欲行玉杯在手山影入
瓊精載道霜氣橫故人天上今白髮賤予山中常倦耕
憑君問訊金闕下羣賢朝回春日明

次韻孟天睇典簿佐奉使行江西所賦

帝念蒼生不鄙夷任賢清問載旌馳山川舊履車書會
草木新春雨露私千道悠悠分楚越四門穆穆出宣慈

舉頭見日天光近老去無憂託啟期

送撫州推官于夢臣改除吳興別駕

撫州那得似湖州千頃鷗波可放舟別駕老便公館靜
高門長憶故園幽綠陰青子人家曉古木疎篁水墨秋
幾欲暫為江海客百年耆舊記風流

送陳繹思歸會稽讀書

右軍高致絕清真況復東牀玉樹春上馬詩成誰共語
讀書鐙迫互為賓落花飛絮縈歸思流水游龍接暮塵

無限當時觴詠意尚疑身是會稽人

送秘書也速答兒大監載書歸成都

連舸載書三十萬雪消春水上成都列仙歌舞成烟霧
世將旌旗屬畫圖定有鴻儒堪設醴豈無佳客共投壺
子雲白首歸無日獨抱遺編隔五湖

送普從昇驛使調廣東

秋露垂珠枸杞叢海天火齊荔枝紅飛行萬里青驄馬
指顧千夫赤羽鴻虎帳夜傳文字密蛟人春貢語言通

一門諸父吾親舊待爾歸朝捷奏同

送成彥舉奏差還湖南

莫憶井州是故鄉江城十載簡飛霜賓鴻不及馳車遠
語燕還迎舞袖長下瀨未休連舸餉觀風頻上奏書囊
雲開南嶽多來往應有高情聽九章

送人回湘用魯子翬僉院韻

東門有客上歸船舍弟過從歎昔年清宴翠帷明諫草
高譚羽扇動江蓮湖南賓客今誰在湘水蘭蓀自可仙

珍重太常臨別語毋忘餐菊飲寒泉

寄監郡敬齋

華蓋天風八月高使君于此重遊遨停雲每約松間鶴
載月同登海上鰲人愛桐鄉留繾綣道傳柏府薦賢勞
柴車已是輪生角那得黃花共濁醪

仲秋二十一日雨後聞桂香東竹齋諸友

曉來滿國桂枝香明歲秋闈第一場明月當樓天廣大
疾雷破柱雨淋浪鬼神幽遠驚雄辨草木欣榮被耿光

于易已占觀六四真儒不數漢文章

訪羅元德隱居

春溪回曲抱郊墟新見幽人水竹居
車馬不知行地樂樵漁常近讀書餘
一川風月閒來往終日雲雷妙卷舒
獨究塵編誰得似同游為記暮春初

憲副李顏帖木兒行部過訪

六月驅馳使者車城南詢問野人居
常編猶記成均舊玉笋親分尚醞餘
師友道存風義重山林歲久禮文疏

但期荒隴霑霖雨課子躬耕理故書

與易小雅

雨過橫塘早擊鮮西鄰宴罷到東園醉吟明月花枝好
坐對涼風桂樹繁玉雪泛甌留夕語銀絲分碗約晨飧
壽朋總憶城南好每採芝苓過遠村

憲府集後書與紀長之

歲暮賓筵坐席深衰顏何足重為欽有岩佐史加邊豆
於粢笙歌備瑟琴佇想虛煩求舊隱聞風實起好賢心

誠孚德合生民慶往昔誰容只在今

與陳維新

新公家在觀橋濱茅屋蕭然不染塵通夕跼跼光炯炯
經時神屋火勻勻一杯秋水留仙客半嶺春雲共野人
借問如何叅絕學破除妄想不求真

答劉無作

南國隱者劉無作古木陰中戶不開惡客任携袍縕去
化人又送飯盂來吟詩窓下猿供筆振錫林間虎卧苔

二十七人尊宿字夜深相對語如雷

答毛南楚惠書

華峯迎對浮邱伯故憶毛公共說詩良夜挂巾松上露
微風揮塵竹邊池近來有夢如春雪重到何人識鬢絲
此去相望三百里時因歸鴈問幽期

答陳明復

城頭雲重鴈飛過憶得江南夜雨多茶樹嶺前雷破石
稻秧田裏水盈科何時短棹鱸蓴菜盡日長松薦女蘿

金匱要略卷之三
卷三
賴有仙翁知此意不同樵唱即漁歌

保同監邑送桑本

樹桑親教縣庭隅分我深根四十株老客遂居連野綠
使君重到兩輪朱寒窓機杼依鄰曲春服兒童出舞雩
頗有薄田衣食計暮年終夢在成都

陳幼德送竹本

竹似陳家好弟兄清陰秀色滿林生八龍夭矯同瑤席
雙鳳參差和玉笙土潤已如含雨氣夜深便可聽秋聲

他年為作青青簡待爾光明獻賦成

謝董子道參政

再世門牆五十霜扁舟風雨渡滄浪少陵生理憑黃閣
孺子高亭歎豫章文學舊游成寂寞廟庭新刻更琳琅
惟應垂白江湖表北望風雲古柏蒼

謝馬昂夫總管

歲宴相看雨雪深一尊春酒故人心曾陪鵷鷺俱塵迹
晚托漁樵得共吟天上鳳毛還禁直人間鶴髮更登臨

畫圖三友題名字漢隸還須老華陰

謝陳溪山慶生朝

自笑青年說學仙
衰翁那復得芳妍
詩書塞坐忘謀食
風雨長齋過禁烟
有樂從教兒輩覺
無言可與世人傳
高情惟是希夷叟
長住蒼松白鶴邊

謝劉伯溫

世外高情與道謀
欲令斷木出寒溝
終身不敢窺韓子
病目誰能念左丘
生晚見聞慚禮樂
業荒文學感春秋

未忘垂白從耕稼
鳴鳥高梧咏不休

謝胡士則

舊學都忘老日侵
故人千里忽相尋
坐依敗壁看蝌蚪
手撥殘編墮白蟬
五色蓬萊前日夢
一窓風雨百年心
羣賢列坐書連屋
至樂無餘祇在今

謝魯元起監縣

雨足時和縣事稀
彈琴學道一儒衣
塵編得意常終卷
匡坐思憂只掩扉
壽母平安充一喜
古人高遠類多違

文章於世真何補每過城南晚味歸

謝揚士弘為錄居山詩稿二首

少日詞章浪得名歸與樸學補餘生
揚雄執戟能清靜庾信凌雲愧老成
游目山川誰妙識興懷河洛獨高情
殘編久棄知無用為錄幽泉絕澗聲

畫戟高門對碧岑公孫才思在登臨
少陵不盡山林吟季子偏知雅頌音
貞觀詩人同制作太平樂府入沈吟
明年何處聽鳴鳳春晝梧桐滿院陰

酬吳彤暨諸友編文

知愧空言惜已衰煌煌三秀感靈芝
山前雲過那堪記水面風來祇自怡
遠使徵書傳盛意良朋定錄副深期
塵編盡淨遺虛几何補斯文與世知

贈義上人赴京

瀟洒澄江對寺門講餘江上看朝曦
白龍起聽經函秘紫鳳來朝佛像尊
召見天人扶履舄還歸帝釋賜幢旛
故人十載靈芝秀春雨山堂誰共論

贈張元樸

黃茅岡迥少人行，目送飛鴻又晚晴。
塵尾每懷張伯雨，鷺羣今屬薛元卿。
天風浩蕩高眠起，夜雪空明老駟輕。
黃石祠前好孫子，莫教塵世苦知名。

贈婁行所二首

三歲京華憶母歸，一邱岑蔚感春暉。
瀧岡墓表非無待，溧水哀吟恐自違。
疏食一簞嗟遠道，送車千兩念征衣。
中間名勝多知己，屬筆何由到草扉。

江上飛花已暮春，朝中憶爾渡江人。
共看傳燭分新火，更與臨流拔舊塵。
使者獻書歸館閣，尚書薦士到絲綸。
斗牛儘有光芒在，緩步行聞接鳳麟。

贈道士

神寶誰開自洞微，紫烟為戶玉為扉。
春容澹薄胎仙舞，夜景虛明脉望飛。
繞指風雷龍睡醒，滿囊雲錦虎馱歸。
猶嫌長物煩聞見，更上高臺一振衣。

贈彭致中游廬山

手持數節羅浮竹直到棲賢三峽橋錦繡烟雲隨鳳起
珠璣淙瀑作龍跳陶潛菊徑須頻往李白松巢亦易招
我與山人俱有約秋風更待海門潮

贈高文舉

志士猶思及物功尚施仁術簡書中江湖隨地宜秋色
桃李成蹊任化工執轡幾時觀逸興揮絃聊復送飛鴻
塵編舊業應無厭八月明河九萬風

贈道士鄒雲山

一片春雲萬仞山
六鼇戴向海波間
金銀樓觀蒼龍戲
日月旌旗白鶴閒
換骨有丹宜早服
虛心如水及秋還
九重元與蓬萊近
看爾仙衣蓮玉班

舟中書贈吳彤

輕烟冉冉日曛曛
好友相從一舸同
白雪夜吟蘇武慢
清波晨動楚王雄
天清洲渚多嘉樹
道遠江湖有暮鴻
不是新知相啟發
歸歟恐負菊花叢

贈徐元度并序

昔時三公丞相掾有賓客之道焉叅決論議
皆國事也接之有禮行之有道是以君子信
之也國為丞相掾特文書論事可否職事有
不得不然者其後三公官備掾屬甚清簡時
人尤貴之然而禮貌輕重之間存乎其人矣
毗陵徐君元度方弱冠時學於吳中鄭明德
氏文藝穎出識者有望焉其於豫章見之則
從事師垣出掾浙省而至於斯也蓋二十有

四年矣雍容以文進退以度識大體不汨於
流俗慎言敏行名實孚於上下鴻漸之羽翺
翔於天亦維其時也哉至正乙酉正月上吉
將為外宰相報政於中若夫方物之獻貢賦
之數有司之常事也在元度優為之矣明良
在上顧惠遠人外將有問焉羣賢方以文學
治道佐明時當有知元度而進之者賦詩以
送之

起家辟掾三公府挂笏西山度歲年故舊總懷天下士
風流更重幕中賢香烟滿袖游絲夢春水如天上計船
三月看花鷁鷺裏題詩還向遠人傳

贈敬上人

二十遊方四十歸人民城郭總依依雲生谷口為雷去
花滿林間作雨飛密室爛泥成寶器諸天劫石拂銖衣
扁舟穩泛鄱陽水更問雲門莫莫機

贈鄒生

君唱銅鞮道更優我歌錦瑟送長游景純廁上灰飛叔
一行門前水逆流曾把仙翁血醫鶴要知衙將面如猴
談天談到八十一好問九州州外州

遣興

千梳白髮度清齋有客柴門始一開書為目昏空對簡
酒因囊溢久停杯北窓風雨長孤坐南海音書遂不來
壠上輟耕童稚輩強來問學慰衰頽

為熊曼初賦靜觀

睡覺東窗鼻息微
水流不競落花稀
風旛底用生分別
塵鏡何情辨是非
春去蝶隨游子夢
秋深螢入定僧衣
可能袖手高閒者
看到行雲作雨歸

滕王閣

高閣城頭戶牖開
江中照見碧崔嵬
文章誰在三王後
雲氣長從五老來
畫角數聲南斗落
白鹽萬斛北風迴
洲前先有蛟龍窟
惟待詩成急雨催

玉華山

何處清江擁玉華
手題名榜寄仙家
光凝石殿千年雪
影動銀河八月槎
藏藥寶函騰玉氣
說詩瑤席散天葩
奎章閣吏無能賦
得似新宮蔡少霞

天峯道院

衆峯環列總名山
更出岩堯紫翠間
上直文星天一柱
中含道氣玉重環
臨池風月清秋老
繞閣烟霞白日閒
溪上墨香傳遠客
令人思與鶴飛還

次韻寄題象外道院

至人還作采真游海上何妨更九州雲氣低回依寶劍
月華臨照是瓊樓舊家孤竹清風在今代三茅碧澗流
凝望蕭臺環日月不知何處問丹邱

寄題三益亭錄呈仲義叅謀

公府蒼松六百尋古梅脩竹共亭陰歲寒先覺冰霜重
春未還知雨露深每得瓊瑰三益友同堅金石一生心
坐令方丈凝香地千里嘉名起自今

題梅仙峯與彭致中

羣仙山上共神宮
漢尉藏丹別有峯
日下旂旛來碧落
雨餘鐘磬出深松
蓬萊秋近雲常接
芝草春生手自封
山木閣前聞拄杖
解尋樵徑遠相從

題新喻吳氏浩然堂

古木澄波月色新
高亭攜手兩幽人
畫圖樽酒猶清夜
屋壁金絲幾暮春
白髮諸孫隨草徑
寒泉一掬薦溪蘋
神交何必曾親到
莫望高車一幅巾

浙西憲郎武子宣監試秋闈

試官往往得鴻儒可以觀瀾在此書憲府優游從事後
貢闈閒暇校文餘虹光西起游湖舫雲氣東隨問俗車
古者八元宣在五復明還見謁宸居

魯國趙公世延哀詞二首

西北聲名世節旄簪紳特起擅時髦百年憂患神明相
世務頻煩志慮勞春雨歸舟江水定秋天一作遺劍雪風
山高東瞻松柏分茅重盛德終聞有顯褒

早歲江東接令儀中朝晚得近論思永懷王母傳經訓

直保孤忠結主知經濟尚多遺策在勤勞空復大名垂
每翻翰墨神交遠惆悵西川鼓角一作悲

故贈奉議大夫太常禮院判官廬陵范公袞輓
名家積行子傳經夜接風雲對大廷一日文章驚海內
九重恩錫賁郊垌奉常天上新題字處士江南舊列星
何事瀧岡遲有待翰林翠琰倚香亭

題楊友直步鶴圖

羣仙玉殿早朝迴獨向空山步紫苔雪色羽毛千仞下

金少卿集卷三
天門風露九重開，碧梧空老人間實。瑤草原非世上材，
真侶相求寥廓去。徐行更待鳳皇來。

春雲亭

石上春雲向晚生，隨風映日在簷楹。莓苔翡翠千年潤，
芝草琅玕五色明。鶴為迎仙香冉冉，鹿能留客露盈盈。
深紅重翠長千斛，細吟清歌奉太平。

題都陽胡仙伯活死人窩

大海何曾着死人，縱饒得活也逡巡。中黃土裏埋焦穀，

太白星前掃幻塵銀漢槎頭成恍惚布帆船子弄精神
太平歌裏無生滅惟有胡笳拍拍真

寄題都陽李氏適軒

豫章出地已千尋仙李盤根接翠陰曲水橋分雲錦麗
老人星見草堂深衣垂五彩看春舞劍化雙龍聽夜吟
借問高軒何所適一門眉壽里人欽

酬書巢送雉尾拂

一帚千金輯雉翬巢公乞與掃塵扉凝膏不食慚金鼎

畫采為章憶聚衣官扇每開春日麗城旌常拂曙星微
諸緣隨起隨除却祇有無臺月鏡輝

會宗海藏主來江西一日山雨稍涼同普安枯
石見過復有還浙之興書偈為別并東一闕
大士同發一笑

試問師歸何處尋稽留峰下白雲深長松正並樓臺秀
流水長交鐘磬音貝葉幾行西域字寶珠一片祖師心
天香桂子人間滿擬約高秋一醉吟

送文學隱上人

西江春漲欲浮天，擬覓何妨一味禪。
渡海晨鐘雲外寺，乘潮晚飯越中船。
鉢分龍腦天香近，茶泛玻璃雪乳鮮。
文采已彰那可隱，芙蓉出水正華年。

送劍江復見心上人游徑山

臺山驀直勿岐差，雙徑峯前路不賒。
若有劍光衝北斗，更愁帆影落誰家。
曲江水暖花千樹，古道秋高月一槎。
記取題詩相送處，鷺鷥和雪立蘆花。

重贈復見心游浙兼柬張貞居

春雨西江漲百川，袈裟又上浙東船。
行尋龍卧雲生徑，坐聽猿吟月浸泉。
客裏有詩煩為寄，山中何法可相傳。
故人或者詢張拙，鼻涕垂頤雪兩肩。

賦文子方家簣簣亭竹影二首

數箇簣簣一小亭，南窓承日印寒青。
水精簾裏珊瑚樹，雲母屏間翡翠翎。
却愛微風動蕭瑟，翻疑薄暮倚娉婷。
憑君縱有鶯溪絹，莫與空花結定形。

憶昔竹枝皆楚歌，何曾舞影見婆娑。
玉山雲氣了然是，湘浦雨痕空復多。
環珮因風猶錯落，旌旗拂日轉委蛇。
白駒皎皎誰能繫，霧閣芸窗奈老何。

梅庭詩為李重山賦

高人獨愛寒梅樹，相對庭中作主人。
盤谷泉甘來素履，長安日近接朱輪。
瓊瑤比德懷新好，鐵石為心憶老臣。
傳得朝紳詩總好，揚州何遜久逡巡。

送戈伯敬東訪伯循御史

扁舟重訪瓊花館使者還我豸角冠定有薦書天上去
豈無懷綬却中看宮牆隔樹聞鶯囀朝路聽雞上馬鞍
頗寄好音傳父老鄉人總說上長安

與侯頤軒并序

道士侯頤軒其先本蜀人父

闕

從我大父尚

書府君來吳中宋亡弗歸頤軒乃學道於洞
庭之仙壇觀集來省墓嘗抱先叔祖岳陽使
君遺書與間白雲來見集不勝感嘆故贈之

以詩

洞庭高士成都客曾是相從大父時每抱遺書嗟往事
復貽妙句樂新知鴛鴦影裏心元靜鷗鷺盟邊願不疑
但得閒身各安健白頭歸共橘中碁

題商德符蜀山圖

每愛商公寫蜀山蒼崖直下竹林間錦城雨後江沙白
劍閣霜餘木葉殷何處揚雄池盡墨誰家杜甫月臨關
釣鰲海上天空濶待得仙槎一往還



道園遺稿卷三